

Long namba 4 de bilong dispela mun, em i namba wan taim nupela Minista bilong ol Teritori, Mista Bill Morrison i bin kamap long Wewak.

Namba wan minista bilong Papua Nu Gini, Mista Michael Somare i bin stap na bungim em. Em i namba wan taim nau Mista Michael Somare i toktok wantaim Mista Bill Morrison.

Mista Somare i bin paitim planti toktok moa wantaim Mista Bill Morrison.

Em hia sampela:

- 1) Toktok long Konstiusenal Developmen.
- 2) Ol trabel i save kamap long Hailans.
- 3) Makim taim bilong Selp Gavman.
- 4) Helpim bilong Australia long Papua Nu Gini long taim bilong selp gavman.
- 5) Toktok long mani bilong Australia nau yumi yusim long dispela kantri.
- 6) Painimaut, Australia i gat wanem kain tingting sapos Papua Nu Gini i kisim help i kam long arapela kantri.

Long ol dispela toktok tasol, Mista Michael Somare i bin lusim Papua Nu Gini long namba 16 de bilong dispela mun na i go long Australia.

Em bai toktok moa wantaim Praim Minista Gough Whitlam.

Bipo Mista Morrison i bin lusim Port Moresby, em i bin tok olsem: Australia i orait long yumi ken kisim indepen-

NUPELA MINISTA GEN



Dispela poto i soim Misis Morrison i toktok wantaim Misis Somare taim man bilong em Mista Morrison, Minista bilong ol Teritori, i kam bilong kibung wantaim Mista Somare, namba wan minista bilong yumi.

dens-long yia 1974.

Planti memba bilong Haus Asembli, olgeta pipel bilong Hailans na sampela arapela lain tu ol i kalap nogut long dispela tok. Ol i pilim sampela arapela kantri i hariapim mipela.

Yumi no wokim konstiusen o lo bilong yumi

yet. Bai olsem wanem yumi inap ranim kantri?

Long neks kibung bilong Haus Asembli long mun Mas ating bai ol i paitim planti toktok long yumi olgeta pipel bilong Papua Nu Gini yet i mas vot wataim yumi laikim independens i kamap.

\$5 PRAIS MANI GEN

Man hia i painim man i hait long las pes na i win-im \$5.

Charles Lapak

C.M. Papitalai

Manus Ailan

Yu tu inap win.

Sapos yu gat tok, yu raitim sotpela tasol. Sapos yu raitim longpela, bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela i prinim nem bilong yu tru, orait yu raitim wanpela narapela nem bilong yu.

NEM BILONG YU SUTIM PIK

Dia Edita.-Plis prinim dispela pas bilong mi long Wantok bai man ia Mathias Tausi bilong Ulamona, bai i ken ritim. Em i bin rait i kam long Wantok na i tok long krai tumaş long mani, long 19-1-72 pes 3.

Halo tru Mathias Tausi, yu i stap o yu i dai pinis? O yes mi amamas tru long yu tok olgeta wokman long PNG, i save krai tumaş long mani, i no save bikpela inap long helpim famili na wan wan wokman. Yu ting wanem?

Nau mi laik askim yu saveman long mani, O.K. pren Sutim Pik hamas pikinini yu i gat? Wanem kain wok bilong yu? Yu bisnisman o yu i stap tasol long ples na laplap, siot na sket bilong meri bilong yu i save kamap nating long graun o yu save baim long stua?

Sapos yu wanpela bisnisman, ating yu wanpela man bilong krai long mani na apim prais bilong samting. Sapos planim kopi na kokonas, yu save kros long ol i no save baim gut.

Sapos yu save mekim olsem na watpo yu tok olsem long wokman bilong gavman na misin? Sapos yu i gat fopela pikinini na yu wok long gavman na ol i baim yu \$10. long fotnait, yu ting em inap long yu na meri, pikinini?

Orait pren, Sutim Pik. hamas wanpela tin mit i

kos na 56 paun rais, suga, sop na i go yet? Sapos tin mit kos 55 sens, na yu i gat 4-pela pikinini yu yet na meri mekim 6.

Bekim pas na tokim mi long Wantok. Orait Mathias yu i no ken kros long nem bilong yu ia, Sutim Pik.

Em yu yet raitim nau mi bihainim.

Peter Maduhina
Wau/Lae



GUTPELA TOK I OLSEM.
SWITPELA WARA.

WOK MARIMARI I NO BISNIS

Dia Edita.- Mi i gat liklik wari bilong mi na mi laik autim long yupela.

Long Hailans pipel i gat bikpela hangre i kamap na gavman i givim kaikai long ol. Sampela kantri tu ol i salim bikpela mani na kaikai long yumi ol i laik helpim yumi na salim i kam.

Tasol long Erave wanpela i gat kaukau lip yet na ol i salim i go long arapela hap. Tasol ol i no salim nating. Gavman i baim gen.

Mi ting dispela pasin tasol em no stret.

Arapela kantri helpim yumi. Orait yumi yet no ken givim mani bilong gavman.

Mi ting ol kaunsil o kiap bilong dispela ples yu mas tokim ol pipel. Na yu helpim kantri bilong yu, tasol yumi salim nating em gutpela. Sapos yu kaunsil o kiap bilong dispela ples yu mas toksave long ol pipel bilong yu na yu tok yumi salim nating. Yu tok olsem em gutpela Kristen kantri.


Ludwig Koke,
Erave/S.H.D.

TOKTOK I NO INAP

Dia Edita.- Mi laik askim yu husat man ken bekim ansa bilong mi. Mi save i go long lotu long taim bilong Sande na ol misionari bilong mi ol i save tok olsem long mipela olsem, yu mas laikim yu yet olsem yu ken laikim ol husat i no bin save long ol. Na long Inglis ol i kolim love.

Na love em i wanem samting? Olsem na mi laik askim yu long dispela kain tok tasol. Tasol taim ol pinisim dispela tok na ol i laik kam ausait ol i no save mekim o tingting long tok ol i kolim love. Nogat. Ol i save lusim tingting na ol i save kros tasol.

Mipela blakskin i tok love, yes em i stret long dispela. Sapos man mipela i no save, mipela mas singautim em i kam na kisim kaikai o slip wantaim mipela. Na mi ting em i stret long mipela long mekim dispela kain pasin long ol. Na mi ting ol wet-



MI PAINIM
OLKAIN
NIUS

skin, nogat tru. Kros bilong ol i klostu tru na mi ting olsem maski long ol i tok love.

Nicholas Nungnendi,
Anguganak.

MASKI BAIM

Dia Edita.- Mi ritim wanpela Wantok niuspepa na mi painim wanpela tok olsem baim meri. Mi ting Lucy B.K. Linda bilong Bougainville em i stret.

Bilong wanem yumi baim meri? Taim God i wokim man na bihain em i tok long helpim bilong man olsem na em i mekim Adam i slip na tekewe hap bun long banis na wokim i kamap meri na givim em long Adam. Na Adam i no baim God long dispela. Nogat. Long wanem em i hap bodi bilong em, na em i bilong helpim em.

Na bilong wanem na yumi wok bisnis long meri olsem na yumi mas mekim tenkyu ofa olgeta dispela mani i go long beng bilong God? Sori yumi no ken wok bisnis long meri. Olgeta kristen mas toktok na lusim dispela. Na yu Joseph R. Isarapu yu mas tingting long dispela.

Sapos yu laik bekim dispela tok yu ken rait tasol i kam long Wantok.

Joseph Natia,
Mainyanda/Bulolo.



GUTPELA TOK I OLSEM
SWITPELA WARA.

NAIP TAMIOK MAN

Dia Edita.- Yes, ol wantok bilong Wantok Niuspepa. Mi laik bai yupela putim hap tok bilong mi insait long hap bilong ol pas long Edita.

Mi bir harim long Redio Wewak olsem. Wanpela meri bin raif na tok, ol meri i no laikim ol yangpela boi go long Vokesenel Senta long wanem ol save i go long bus wantaim naip tamiok na pamuk long bus.

Susa ia i tok, em i gat laik long man i wok long taun na putim su soks.

Yes, susa, gutpela tingting bilong yu tru. Tasol, susa, yu mas tok stret long wanem man i laik maritim yu. Na tu em i no gutpela tok yu mekim.

Yes, susa sapos mi no gat bai kantri bilong yumi Papua Nu Gini kamap gut? Yu tingim su soks man em i stap antap olsem morota bilong haus na mi naip tamiok man i stap olsem pos bilong haus. Sapos mi no gat bai haus i pundaun. Olsem tasol kantri bilong yumi nitim man olsem mi em i bun baksait bilong kantri.

So, susa, yu no gat tingting tru.

Pius Balai,
Angoram.

BONANZA KISIM MANI

Dia Edita.- Mi laik save bilong wanem ol kampani bilong ol narapela kantri ol i save kam long kantri bilong yumi Papua Nu Gini na mekim wok o kisim wan siling bilong Papua Nu Gini?

Ol i save askim papa bilong dispela Teritoritu o nogat? Harim gut sapos papa i baim wanpela ka bilong mi na mi wok long raun long en.

Bihain narapela pren i kam na pulim dispela ka long mi na i spitim i go pinis. Na bihain mi ran ran i go tokim papa. Yu tingting papa i no ken kros sapos em i harim long ka bilong mi. Wanpela man i kam pulim na hambak raun long em?

Nau harim mi tok long pas: kampani. Em mi min olsem long dispela kampani em ol i kolim Australian Bonanza. Husat papa? Em Gavman bilong yumi yet long Papua Nu Gini. Nau tasol i gat planti tok long dispela kampani. Ating em i no bin toksave long Papa Gavman i lukaut long dispela pikinini bilong em.

Watpo papa i no stopim em taim i kam nambawan taim na pulim wan siling bilong mi i go. Ol narapela kampani i orait tasol Australian Bonanza i kisim planti mani bilong planti man long wanpela taim tasol. Na bihain olgeta man i lusim mani bilong ol. Na wanpela man tasol bai win na kisim dispela \$12,000 dola na wanpela man bai i go lus nating na sindaun sore i stap na em i nogut laka?

Em tasol tenkyu. Husat brata yu gat kros o toktok bilong stretim tingting bilong mi, rait tasol i kam long Wantok

Nius na bai mi amamas tasol long ritim ol tingting na kros bilong yu.

Otto Ayong,
Guma, Wide Bay/E.N.B

INGLIS TASOL

Dia Edita.- Nau mi laik autim wanpela wari bilong mi. Mi i gat wanpela tingting olsem. Mobeta yumi Papua Nu Gini yumi yusim tripela tok ples em gutpela: Inglis Motu na Pisin.

Mi ting mobeta yumi wokim wanpela skul bilong kisim save long Inglis, maski long rit na rait. Kisim save long toktok em inap. Bilong wanem? Taim mi go



long wanpela hap, na mi lukim wanpela skulboi o wanpela wetman na em mekim tok Inglis na askim mi wanpela samting.

Na mi i stap olsem hap diwai stret, bilong wanem? Em mi no save em toktok i go tasol mi i no harim. Na bihain em pulim tok Motu tasol em tu mi no harim. Man dispela taim mi kisim bikpela sem. Man save tumas long Motu Inglis ol les long harim Pisin, na planti wetman ol no save long tok Pisin. Nau mi sem long toktok wantaim ol man save long tok Motu na Inglis.

Sapos yumi wokim wanpela skul bilong kisim save long harim Inglis. Na kantri bai kamap gutpela, ating em tasol dispela wari bilong mi ol brata husat man les long dispela wari bilong mi ol brata husat man les long dispela tok orait rait i go long Wantok.

Peter Papu,
Erave/S.H.D.

OLSEM WANEM LONG TOK BILONG GOD?

Dia Edita.- Nau mi laik autim wari bilong mi. Yes, ol brata na susa. Nau em i taim bilong selp gavman nau.

Tasol wanpela samting yumi mas bihainim lo bilong gavman bilong yumi. Tasol olsem wanem long God? Sapos yumi kisim selp gavman na bihainim lo bilong selp gavman na lusim tok bilong God, olgeta bai i gat trabel long taim bilong gavman bilong yumi.

Yumi olgeta i save pinis God em yet i bos. Sapos yumi no lotu long God long taim bilong selp gavman bai God yet bai i strafim yumi.

Mi ting yumi olgeta i pikinini bilong God vu-

mi mas oltaim bihainim lo bilong God olsem nau yumi mekim. Yumi mas beten planti bai God i ken helpim ol memba bilong Haus na bai ol i wok long stretim sindaun bilong yumi.


Em tasol wari bilong mi.

Thomas Kunfetum,
Igom/Madang.



RAITIM PAS LONG WANTOK

MEMBERS OF THE CONSTITUTIONAL PLANNING COMMITTEE



KONSTITUSENEL PLENING KOMITI

Konstitusenelel Plening Komiti em i wanpela lain 15 memba bilong Haus Asembli i wokim lo o konstitusen bilong Papua Nu Gini. Hetman tru bilong komiti em i Michael Somare yet na namba tu siaman em i Pater Momis.

Sapos yu lukim dispe-la piksa antap bai yu lukim ol 15 i kam long olgeta hap bilong kantri.

Long mun Februeri ol i laik statim pasin bilong mekim planti miting long olgeta hap bilong kantri bai ol i ken painimaut tru tingting na wari na aidia bilong olgeta pipel bilong Papua Nu Gini.

DISTRIK MITING

Pastaim, long olgeta distrik bai i gat distrik miting. Hia komi-

sina na olgeta memba bilong Haus Asembli bilong dispela distrik, na ol bikpela man bilong olgeta dipatmen bilong gavman, sampela lokal gavman kaunsila, sampela hetman bilong ol misin, na sampela arapela man i laik kam...bai ol i bung na toktok.

Bihain, dispela distrik komiti bai i makim samting olsem 30 bikpela man bilong wanpela wanpela kaunsil distrik bai ol yet i ken bung na autim ol tingting bilong ol pipel.

OL TISA

Gavman bai skulim ol sampela lida o tisa bilong sindaun paitim tok wantaim ol lida hia na givim tingting bilong gavman long ol, bai ol yet i ken skelim.

Ol praimer i skul tisa

bai i gat bikpela wok long skulim ol bikpela manmeri long ol dispela nupela samting. Bai gavman i askim ol long wok tu olsem lida bilong ol kibung long hap bilong ol; na 4-pela taim long yia bai ol i skul inap tupela de long ol pasin bilong ranim dispela kain kibung na bekim ol tok bilong ol kwesten.

RIPOT

Bihain gen bai ol i ripot long ol aidia na tingting bilong kibung na salim i go long hetkota bilong Konstitusenelel Plening Komiti long Port Moresby.

Sapos sampela manmeri i laik salim tingting na aidia bilong i go tasol ol i no inap rait orait, ol tisa yet i mas helpim ol. Ol i no ken kisim pe long dispela; nogat; ol i mas mekim nating olsem liklik ofa i go long gav-

man.

RAITIM PAS

Ol man i laik rait i mas salim pas i go long Executive Officer Constitutional Planning P.O. Box 6605

BOROKO

Gavman i laikim tumas bai planti man i rait. Ol inap rait long tok inglis o pisin o motu.

Pastaim tru bai ol i toktok long kain kain pasin bilong gavman na bilong sitisensip...em i min husat tru i bilong Papua Nu Gini na inap stap insait long gavman na stap olgeta long dispela kantri?

Wanpela arapela samting em hia: bai bikpela gavman long Port Moresby i givim hamas pawa na strong long han bilong ol lokal gavman kaunsil na distrik?

Ol dispela samting bai mipela long WANTOK i save autim.



statim nupela bisnis

Mista Igo Tutara bilong Port Moresby i statim nupela bisnis bilong hairim ol ka. Em i gat 7-pela ka long nupela kampani.

Hia em i sanap wantaim pikinini meri bilong em Mea, em i mekim wok kuskus long kampani. Na kanderere bilong em, Loa Tau, i save penim ol sain na mekim wok mekanik wantaim Mista Tutara.


Mista Tutara i winim 18 yia olsem mekanik long Boroko Motors, na narapela 8-pela olsem mekanik long narapela kampani bilong hairim ka. Em tu i ranim skul bilong draiv.

Developmen Beng i helpim wok bilong em.



MISS MIRIAM ROSE UNGUNMERR, lokal tisa bilong Australia na meri i save tumas long penim piksa i lukluk raun long Papua Nu Gini nau.

Yu no gat lektrik?
Maski, samting nating.
Kisim tasol dispela lam
kerasin: PETROMAX. Em i
win tru, i lait olsem
san.




ORIGINAL
Petromax
MADE IN GERMANY




TOYO

TOYO taia i
nambawan tru
bilong olkain
ka, trak, bas.



Yu laik ol poto bilong yu i
kamap klia na kala bilong ol
i lait tru? Putim AGFA film
insait long kamera bilong yu.

DOLMAR so inap long mekim
wok bilong tenpela man.
Yu malolo; em i wok.



BRECKWOLDT & CO. (NG) PTY. LTD.

PORT MORESBY · MADANG · RABAU
LAE · MT. HAGEN · WEWAK · KIETA

stori bilong tumbuna

KOTKOT NA HUL WARARA

ALI em i wangepela Ailan, long dispela Ailan yet wangepela liklik ples ol i kolim MALUNG. Dispela ples bipo i no gat wara bilong kukim kikai. Ol tumbuna i save kisim wara long ren tasol. Taim bikpela san ol i lus tru long wara.

Wangepela taim wangepela lapun man bilong dispe-

la ples Malung yet i wokabaut i go long nam-bis. Em i lukim wangepela blakpela pisin, nem bilong em kotkot. Em i bin go daun long wangepela hap tasol. Orait dispela lapun man i hait i stap lukim dispela kotkot. Dispela kotkot yet i mekim wangepela liklik hul wara. Taim dispela

lapun man i lukim olsem em, i wokabaut i go klostu long dispela hul wara. Orait kotkot i lukim dispela lapun man na i flai i go antap long wangepela bikpela diwai. Dispela diwai ol i kolim Tau. Orait dispela kotkot i sindaun i stap lukim lapun man hia i wokabaut i go stret long hul wara.

Long hul wara yet i gat wangepela ston i stap lapun man hia i lukim olsem, em i traim long tekewe dispela ston. Lapun

pun i tekewe ston nau em i lukim dispela hul wara, man em i hepi nogut tru.

Taim lapun man i go bek long ples em i no tokim ol arapela long dispela hul wara hia. Oltaim em i laik go long gaden o em i go long sampela hap, em i save pasim gut haus bilong em. Nogut ol man nabaut i go raun arere long haus bilong em.

Olsem tasol long wangepela taim sampela lapun man na lapun meri i lukim em olsem, orait wangepela de dispela lapun man hia i laik go kisim wara gen long dispela hul wara. Na wangepela lapun man i go hait i stap na lukim lapun man i go stret long dispela hul wara. Em i kisim pinis, em i kisim lip bilong diwai na haitim dispela hul wara. Orait arapela lapun man i hait i stap na em i lukim em pinis em i go bek long ples na i tokim ol arapela lapun manmeri long ples.

Nau ol i save olsem wara i stap arere long haus bilong ol yet. Na ol arapela tu i go lukim dispela hul wara na ol i go drinkim dispela wara i swit moa olsem ren wara.

Taim dispela lapun man ya i kam bek, em i kros nogut tru long ol i kam kisim wara bilong em. Tasol ol i tokim em olsem dispela wara i bilong ol, olgeta wantaim.

Na nau long dispela taim dispela hul wara i stap yet nau long Malung viles long Ali Ailan.

Mr. B.A. Mongalil,
Ali Ailan/Aitape.



Mipela helpim kantri asde tude tumora

Ol balus bilong mipela i save flai moa long 200 taim long wik.

Mipela i gat sampela pailot i bin draivim balus inap 18,000 aua.

Mipela save flai i go long 40 ples balus insait long olgeta hap bilong Papua Nu Gini.

Olsem tasol, mipela i pilim mipela i save moa long flai long Papua Nu Gini.

Na wanem, em i ples tru bilong mipela Ansett.




Serving the country-yesterday, today & tomorrow



AIRLINES OF PAPUA NEW GUINEA
in conjunction with ANSETT AIRLINES OF AUSTRALIA

AP112

Inap nau Hailans Femin Apil i bin bungim moa olsem \$755,000. Ol i kisim promis tu long narapela \$400,000.




INAP RING I GO LONG OLGETA HAP NAU

Ol nupela stem bilong Papua Nu Gini i soim poto bilong ol dis na ol mas o taua bilong wailis na telipon, bilong yumi. Em ol nupela samting i sanap nau antap long sampela bikpela maunten. Ol dis hia i olsem yau inap kisim tok i kam longwe na dis tu i ken salim tok i go longwe gen. Nau yumi ken ring long telipon na toktok wantaim ol pren long ol longwe taun insait long Papua Nu Gini.


Yu lukim tasol dispela mep daunbi-lo long lephan i soim olsem wanem ol telipon nau i sut i go. I no gat narapela kantri wansolwara bilong yumi inap long Papua Nu Gini long ol dispela wok wailis na wok telipon.

Gavman bai i lusim moa olsem 20 milion dola long en. Ol helikopta tasol inap long karim ol masin i go kamap long ol dispela maunten i antap moa. Man i no inap. Na planti wokman i hatwok tru long ples i kol tumas long sanapim ol stesin wailis na mas na dis. I no gat rot i go long ol dispela hap.

I gat waia tu i go aninit long solwara na i pasim yumi wantaim Australia, Yurop, na Amerika.



NUPELA MASIN BILONG WOKIM SAKSAK



Nau em i isi tru long ol man bilong ol ples i gat saksak.... Nau ol ples i ken bung na baim wanpela masin bilong wokim saksak... Nau yu ken wok bisnis wantaim saksak....

*yu raitim pas
tasol na askim
long*



KIWI INDUSTRIES, P.O. BOX 1116, LAE

Yu ken askim tu long:
KEREMA LOKAL GAVMAN KAUNSEL
na
SEPIK COASTAL AGENCIES, WEWAK

Baim masin bilong Papua Nu Gini stret....



Em hia ol wokman bilong telipon kampani i pasim ol waia bilong telipon i save go insait long wanpela gumi na slip aninit long solwara. Mista Michael Lae i wok long sodaim ol waia; Mista Tom Hafaman i helpim em; na Mista Rodney Nikara i sambai lukim tupela. Mista George Newport i bos.



(1) Yia 1972 i stat long fopela politikal pati i resis long winim vot.

(2) Hetman bilong ilek-sen, Mista Simon Kaumi, i toktok wantaim Yunaitet Nesens tim i kam lukim ileksen.

(3) Long mun Mas namba wan sip Margit Brovig i kam kisim graun kopa long Bougainville.

(4) Long mun Epril namba tri Haus Asembli i bung na i gat 100 memba. Tripela pati i bung na i kamap koalisen gavman na ol i makim Michael Somare olsem namba wan minista bilong Papua Nu Gini.

STORI YIA

OLGETA FOTO I KAM LO

(7) Long mun Ogas olgeta biktaun inap ring stre long ol arapela taun.


(8) Long Nesanel De sampe man i putim plak antap tr long Maun Wilhelm.



(9) Bikpela hangre i lai bagarapim 130,000 pipel r gavman na ami i helpim ol No gat wanpela i lus.



(5) Long mun Me i gat so long Goroka na planti turis i bin kam long Papua Nu Gini.



(6) Mis Theresa Ala'u bilong Westen Ailans i winim resis na kamap Mis Papua Nu Gini.





**LONG
72**
T.E.S. TENKYU TRU

1) Nupela Minista bilong Teritori, Mista Andrew Cock, i statim wok.
 2) Long pestode bilong n sampela man i kisim tal na prais.
 3) Yia i pinis long gut-a nius: ol kantri i sot g. kopi; mipela nogat . i hia i redi long go...



TRABEL LONG HAILANS

Long namba 24 de bilong mun Desemba long yia i go pinis 7-pela man bilong Goroka i bin kilim 2-pela bikpela lokal ofisa i wok long Goroka. Ka bilong tupe-la i spit na krungutim wanpela liklik pikinini meri nem bilong em Linda Sapuro.

Taim 2-pela man hia i laik go ausait long helpim dispela liklik meri, 11-pela man wantaim papa bilong meri hia ol i raunim na stonim na paitim 2-pela tarangu hia na kilim 2-pela i dai.

Nem bilong 2-pela man hia em long Dokta Luke Robin, Rijonal Helt Ofisa, na Mista Peter Moini, namba tu Hetman bilong Diaptmen bilong Edukesen long Goroka.

Dokta Luke Robin i gat 32 krismas na em i no marit. Em i bilong Kieta long Bougainville. Mista Peter Moini i gat 30 krismas na em i marit na i gat 2-pela pikinini. Em i bilong Buin long Bougainville.

Plis bilong Goroka i holimpasim 6-pela man wantaim papa bilong dispela meri na kisim ol i go long Goroka Distrik Kot.

Long 27 Desemba samting olsem 600 manmeri

ol i bin go long lotu misa long makim indai bilong Dokta Luke Robin wantaim Mista Peter Moini. Bihain bikpela lain moa i go long ples balus na i lukim wanpela smolpela balus i kisim bodi bilong tupe-la na karim i go stret long Bougainville.


Planti ol bikpela man bilong Hailans wantaim bilong Bougainville tu ol i wari nogut tru long lusim 2-pela gutpela man bilong ol.

Planti ol lokal dokta na lokal tisa bilong nambis i pret nau long wok insait long ol hap bilong Hailans.

Tasol Mista Michael Mel, wanpela memba bilong Hailans Liberesen Fran, i tok olsem em i no stret long tingting olsem dispela 2-pela man i kam long nambis na olsem ol man bilong Hailans i kilim 2-pela. Nogat. Dispela wankain trabel yet inap kamap long ol man bilong Hailans tu.

Nau i gat wanpela lain man o komisin i raun nabaut long Hailans long stretim tok na painimaut as bilong ol pait i save kamap namel long ol lain bilong Hagen na Simbu na Tambul na Laiagam.

Kain pasin olsem i



Ol paitman i brukim banara na spia na gutpela taim i ken kamap long olgeta hap bilong Papua Nu Gini - em i hop bilong yumi olgeta long 1973.

bagarapim gutnem bilong Papua Nu Gini. Australia na planti arapela kantri i wari, i ting yumi no inap sindaun gut.

Siaman bilong dispela komisin, Mista Philip Matuakan Paney, i tok bai ol dispela lain man i lukluk raun long Mt. Hagen, Mul Dei, Baiyer Riva, Wabag, Wapenamanda, Laiagam, na Kandep, Minj, Banz, Jimi Riva, Kerowagi, na Kundiawa.


Ating yu save

Wanem 4-pela samting i winim bikpela mani long Papua Nu Gini? Em hia: kopa, kopi, kakao, kopra.

Hamas waitman i lusim Papua Nu Gini long yia i go pinis? Moa olsem 5,000. I gat 48,000 yet i stap.

Long mun Oktoba Lae i namba wan pasis bilong kisim na salim kago.

DOK MASKI



Man, em i gutpela tru. Mi wanpela tasol i stap.

WHAT DO YOU MEAN ALONE!



Wanpela tok i kamap: "Giaman bilong yu."



"Mipela olgeta laus i stap hia wantaim yu."

SWIT MOA!




Dispela marasin bilong klinim tis, ol i kolim long "COLGATE". Smel bilong em i swit moa yet. COLGATE i nap long rausim ol liklik pipia bilong kaikai i pās long tis bilong yu. I klinim tu retpela pipia bilong buai long tis.

Sopos yu usim COLGATE bilong klinim tis bilong yu long olgeta dei, bai tis bilong yu i stap klin oltaim.

Yu nap painim dispela marasin COLGATE bilong klinim tis long planti stua long hap yu stap. Em i gutpela marasin tru bilong lukautim oltaim tis bilong yu.

Sopos yu go long stua yu askim long COLGATE marasin bilong klinim tis.

SAVE LONG OL MEMBA



MISTA DONATUS MOLA
(Not Bougainville Open)

AS PLES: Buka

OL KRISMAS: 45

SKUL: Em i skul long Rigu Haiskul inap long standet 8. Em i tren olsem tisa long Patupatuai.

WOK: Em i tisa na fama, na em i memba bilong Bougainville Distrik Advaiseri Kaunsil na memba bilong Buka Lokal Gavman Kaunsil. Em i bin wok didiman olsem namba tu kiap inap 8-pela yia. Em i go mekim 6 mun lida skul long Viktoria long Australia. Em i Minista bilong Bisnis Developmen.

LUKIM PINIS: Em i bin go lukim planti kantri.

FAMILI: Em i marit na i gat 9-pela pikinini.



MISTA JULIUS CHAN
(Namatanai Open)

AS PLES: Tanga Ailan

OL KRISMAS: 33


LOTU: Katolik

SKUL: Em i bin skul long Nu Gini na Australia.

WOK: Em i namba tu spika bilong Haus Asembli na em i siaman bilong Pipels Progres Pati. Em i kamap memba bilong Haus Asembli long yia 1968.

LUKIM PINIS: Em i bin go pinis long Australia, Nu Kaledonia, na Fiji.

FAMILI: Em i marit na i gat 3-pela pikinini.



MISTA AMENAO JONGOMBEI
(Nawae Open)

AS PLES: Bawan

OL KRISMAS: 30

LOTU: Luteran

SKUL: Em i bin go long skul inap long standet 6. Bihain em i go long Vunadidir Lokal Gavman Trening Koles long Rabaul.

WOK: Em i kaunsil klak bilong Mumeng Lokal Gavman Kaunsil. Na bihain gen em i stap kaunsil klak long Nawae Lokal Gavman Kaunsil. Em i bin statim wok wantaim Lokal Gavman Kaunsil long yia 1963.

FAMILI: Em i marit na i gat 4-pela pikinini.



MISTA IBNE KOR
(Nipa Open)

AS PLES: Kware

OL KRISMAS: 30

LOTU: Englikan

WOK: Em i bin wok olsem viles plisman inap 11 yia. Bihain em i kamap presiden bilong Nipa Lokal Gavman Kaunsil. Em i wanpela bisnisman na em i gat wanpela tretstua.

FAMILI: Em i marit na i gat 3-pela pikinini.

SIOS I LUKLUK LONG EM YET

Long de namba 21 bilong Novemba inap long de namba 6 bilong Desemba, 1972, Sios Katolik long Papua Nu Gini i bung bilong lukluk long em yet. Dispela kibung i kamap long Alexishafen, klostu long madang.

Wan wan daiosis i salim sampela pesman long dispela kibung olsem na namba bilong ol deliget i kam inap 56. Em ia: 2 asbisop, 4 bisop, 27 pris, 5 brata, 6 sista, na 12 arapela manmeri. Taim Bisop Rowell bilong Aitape i statim dispela kibung, em i tok ol deliget i mas

gat hop dispela kibung i ken helpim sios katolik long Papua Nu Gini. Olsem na ol i mas tingting gut na rausim olgeta wari bilong ol long dispela 4-pela samting:

1.) Olsem wanem bai Sios Katolik inap kamap sios tru bilong Papua Nu Gini?

2.) Wanem samting yumi mas senisim long ol wok misin?

3.) Wanem ol wari i bikpela tru bilong Papua Nu Gini? Inap long sios i ken makim sampela saveman bilong wok long stretim ol dispela wari?

4.) Ol wokman bilong kain skul bilong mekim gupela wok bilong God?


Dispela kibung long Alexishafen em i namba wan tru bilong ol 15 daiosis wantaim.

Ol deliget i bin go bek long ples na ol bai kirapim kibung long wan wan daiosis bilong ol yet. Bihain i gat smolpela kibung long wanpela wanpela misin stesin bilong daiosis.


Sios katolik i laik bai ol memba i mas pre na tingting long painim kain kain rot bilong strongim bilip bilong ol. Sios em i no pris tasol, em olgeta memba. Olsem olgeta i mas taitim bun na lukluk strong long ol yet long painim sampela nupela rot long mekim sios i go het.




OMO i mekim klos i lait tru. Putim OMO long wanpela dis.




Nau paitim wara long han bai spet i kamap. Nau wasim klos




Nau kapsaitim wara antap long Omo. Kolwara i orait tu



I pinis, yu rausim doti wara



Wasim klos gen long klinpela wara nating. Maski sop.



Orait, nau yu lukim: klos i lait tru. Tenkyu long OMO sop





OL LOKAL KADET

Long namba 4 de bilong mun Desemba 1972, namba wan minista Mista Michael Somare i bungim 9-pela kadet i pinisim skul long Militeri Kadet Skul i stap long Igam Bareks long Lae.

Lain kadet hia bai i go long skul bilong ol kadet ofisa i stap long Potsi (Portsea) long Australia.

Inap wan yia olgeta

bai ol istap long dispela skul, na kisim moa save long ol wok bilong ami. Taim ol i winim dispela skul bai ol i kamap ofisa insait long lain ami.

Long lephan hia Kadet Geoffrey Wiri bilong Westen Hailans Distrik, i winim prais long kisim hai mak long ol skul wok bilong em.

KOPRA PRAIS I GO ANTAP

Long Desemba ol man bilong salim kopra i pret long wanem mani bilong Australia i bin go antap na ol mani save baim long dola bilong Amerika.

Tasol nau Kopra Bot i apim prais inap \$5 moa. Olsem nau wanpela tan kopra i kam inap \$113.

lokai nambatu kia

Mista Bernard Barok, wanpela man bilong Manus, i bin go long Goroka bilong wok wantaim Distrik Komisina.

Nau tasol em i bin pinisim wanpela kos bilong ol bikpela ofisa long Edministretiv Koles long Port Moresby.

Inap 6-pela wik em i bin tren long ofis bilong wanpela kuskus bilong Tweed Heads, wanpela taun long Australia.

Mista Barok i bin holim wok insait long gavman inap 10-pela yia na inap 6-pela mun em i bin wok olsem nambatu kia bilong Rabaul.

buablung haus

Watkins Kampani i bin kisim kontrak long wokim nupela Buablung Haus o hostel long Lae. Em bai wanpela haus slip inap long 96 pipel, na i bilong ol wokmanmeri long Lae ol i no gat ples bilong stap long nait.

Inap nau komiti i bin bungim \$150,000 long en.



KOMATSU

KOMATSU'S D85A Crawler Tractor featuring Cummins NH220 Diesel engine at work on the Daulo Pass, Eastern Highlands

the power and strength for Papua New Guinea

Parts and after sales service for KOMATSU Crawler Tractors and Track Loaders is provided by TUTT BRYANT PACIFIC LIMITED throughout Papua New Guinea and The British Solomons. Write for further details on how KOMATSU can help you in Papua New Guinea



Tutt Bryant Pacific Limited

LAE-MADANG-PORT MORESBY-GOROKA-RABAUL-KIETA

kaunsil nius

YUNIVESITI STUDEN RAIT LONG KAUNSI

Dia Kaunsila.- Mipela ol man na meri bilong Nu Hanova yet sapos mipela i save go bek long Kavieng long taim bilong Krismas, mipela i save go painim nabaut ples bilong slip. Sampela taim mipela i save go nating na go slip long ol haus bilong sampela man em ol wok long taun. Tasol, mipela i planti tumas na ol haus bilong ol man long taun i no inap long mipela olgeta.

Yumi olgeta i save se Lavongai Kaunsil i no gat bikpela mani bilong ranim ol wok bilong em insait long Nu Hanova yet.

Na wanpela we bai kaunsil inap kisim mani long en i olsem:-

Lavongai Kaunsil inap wokim wanpela kain haus ol i kolim long Hostel (haus bilong slip) long Kavieng? Sapos kaunsil inap wokim dispela kain haus, bai inap helpim ol manki skul long Nu Hanova yet. Na tu, bai inap kisim planti mani long ol man na meri em ol i save kaikai o slip long dispela hostel. Long wanem, i no gat hostel i stap pinis long Kavieng.

Ol man bilong Nu Hanova sapos ol i kam long Kavieng, bai ol tu i mas yusim dispela hostel bilong slip na kaikai tu. Olgeta mani em i kamap long dispela hostel bai go long Lavongai Kaunsil bilong wokim ol wok bilong kaunsil yet.

Sapos kaunsil i ting, dispela tingting i no gutpela tumas, orait larim i stap. Tasol mi,

mi laik helpim kaunsil long sampela kain rot bilong wokim bisnis.

Em tasol liklik tok-tok bilong mi.

Sebulon Pasingandikek P.N.G. Yunivesiti.

NO LAIKIM ERIA AUTORITI

Goroka Lokal Gavman kaunsil i vin bot egens long eria autoriti long hap bilong Isten Hailans. Ol 13 kaunsila i gat 25 i vot no-gat.

Ol kaunsila i no laik bikos ol i pret bai ol mani bilong bikpela kaunsil bilong ol i lus long ol liklik kaunsil i gat vot inap long bikpela kaunsil. Ol i pret ol kaunsil bilong bus bai pasim rot bilong go het long wanem ol i no save gut long ol pasin na wari bilong ol biktaun.

Wanpela pasin bilong go het Goroka Kaunsil i bin soim taim Mista Boyamo Sali, minista bilong lokal gavman, i bin kam opim nupela pam bensin bilong gavman kaunsil stret.

Long dispela taim em i tok strong long wanpela samting: ol lokal pipel i mas lainim pasin bilong bihainim tok bilong ol lida bilong ol na ol i no ken wetim oltaim bikpela gavman i mas bosim ol. Bilong dispela ol i gat lokal gavman kaunsil; bilong dispela lokal gavman kaunsil i stap klostu long ol ples.

29 NUPELA KAUNSI

Las mun Kainantu Lokal Gavman Kaunsil i holim wanpela miting.

Long dispela miting, i gat 29 nupela kaunsila i stap insait wan-

taim ol 59 olupela kaunsila.

Ol dispela nupela kaunsila i kisim mak o medal bilong ol kaunsila insait long dispela miting yet.

Namba tu kiap bilong Isten Hailans, Mista P. J. Walsh na Mista Barry Holloway spika bilong Haus Asembli na memba bilong Isten Hailans, i givim ol dispela mak o medal bilong kaunsil long ol.

LAIKIM OLKAIN KALA

Mumeng Lokal Gavman Kaunsil klostu long Lae i laikim ol man bilong olkain kala i stap long kaunsil bilong ol.

Ol i laikim nupela kaunsil i gat 32 memba.

Dispela Mumeng kaunsil tu i bin lusim 1954 dola long helpim ol ples Dambi, Towangala, Kapin No. 2, na Kumalu long kisim wara stret long ples bilong ol. Ol sampela i kisim mambu na arapela i kisim tang

wara.

Kaunsil i bin wokim tu sampela bris bilong ol man i ken wokabaut.

BAIM BOT BILONG TANGA

Namatanai Lokal Gavman Kaunsil bai baim wanpela bot bilong ol pipel i stap long Tanga Ailan long Nu Ailan.

Mista Robert Seeto, kaunsil presiden, i tok bai kaunsil i givim 650 dola long ol Tanga long baim bot.

KLASIFAIT

PABLIK NOTIS

YU SAVE gutpela rot long wokabaut bilong yumi long olgeta de? Sapos yu laik kisim nating dispela buk, salim pas long Booklet, Box 1096, Boroko.

Wantok Publications bilong Wewak (P.O.Box 369) i wokim, na Wirui Pres long Wewak i prinim.

KRISTEN PRES i wokim kain kain buk bilong strongim bilip na bilong sanapim gutpela pasin na sindaun na bel isi bilong ol manmeri na ol pikinini.

Nau yu ken baim 4-pela "Arch Book" long tok Pisin:

**Pis I Kisim Jona
God I Helpim Daniel
Haus Antap Long Ston
King Em I Singaut**

*4-pela Baibel stori bilong ol pikinini.
Ol papamama i laikim ol tu.*

Salim oda i go long:



KRISTEN PRES

Sales Division
The Christian Book Centre
Box 222, Madang

PAINIM 5 DOLA HIA

OL LO BILONG WIN

Painim wanem samting i stap insait long piksa. Pastaim yu ritim tok aninit long piksa bilong painimaut wanem samting i hait na yu mas painim. Bilong painim yu mas tanim tanim piksa nabaut nabaut.

Kisim pensil na raunim dispela samting yu bin painim long piksa, bai mipela i ken lukim yu bin painim tru o nogat.

Hariap, mipela i mas kisim bek piksa insait long wan mun. Mun i stat long de yu lukim daumbilo long olgeta pes bilong dispela niuspepa.

Nau salim piksa wantaim nem na adres bilong yu i kam long :
 PIKSA
 BOX 396
 WEWAK

Pepa bilong olgeta manmeri i givim stretpela tokbek bai i go insait long wanpela basket. Bihain wanpela pikinini i pulim wanpela piksa i kam antap. Sapos em i bilong yu, orait, yu winim 5 dola (\$5.00).

Em tasol. Yu traिम. Em j isi moa.



Mama pato i lukautim pikinini bilong em na em i singaut singaut i stap. Pikinini bilong em i swim i stap long riva na mama pato i lukim em pinis. Tasol wanpela dok nogut i hait long arere long wara. Em i laik kilim mama pato. Yu inap painim dispela dok?

Nem bilong yu:

Adres:

.....

Sapos yu stap long skul o long kaunsil o long wanpela klap, mobeta yupela kisim planti WANTOK i kam olgeta taim. Sapos yupela kisim 10-pela o moa, bai prais i daun tru. Yu rait na askim mipela tasol.

Hia nau yu raitim :

Nem:

Adres :

.....

Mi laikim pepa i kam olgeta taim

Salim i kam long :

WANTOK - P.O. BOX 396 - WEWAK

Sapos yu wanpela yu laik kisim WANTOK i kam long yu stret, orait yu salim dispela tiket i kam:

Mi laik kisim WANTOK niuspepa inap wan yia olgeta. Nau mi salim \$4 (foa dola) i kam;

Nem:

Adres:

.....

Salim i kam long :

WANTOK - P.O. BOX 396 - WEWAK